



DEO OPTIMO MAX.

UNI ET TRINO,

VIRGINI DEIPARÆ, ET S. LUCEÆ,  
Orthodoxorum Medicorum Patrono.

QUÆSTIO MEDICA.

CARDINALITIIS DISPUTATIONIBUS;  
*manè discutienda, in Scholis Medicorum, die Jovis nono  
mensis Maii, Anno Domini M. DCC. XLIII.*

M. NICOLAO LE ROY DE SAINT AIGNAN,  
Doctore Medico, Præside.

*An peregrinatio utilis Medico?*

I.



OMO non imperiali verbo ut cætera creata, sed propriâ Dei manu constructus, longe præstantiori supra cæteras animantes, conditione spectabilis. Hæc admirabilis corporis machina, jugi & placido fluidorum circuitu, solidorum æqua occillatione, sustentatur, vivit; ab interrupta, inæquali, languidiori, feritur, elanguet, aberrat; unde varia morborum variè debacchantium cohors. Beati nomen occupet ille qui cæli muneribus (*æer, cibus, potus, motus, quies &c.*) sa-

A

pienter uti noverit; iis utatur natura præscribit, abuti vetat. Communes sunt brutis & hominibus & in iis naturam observet Medicus, ut illam sciat, & imiteretur. Optimè in arte Medicâ educatum existimes eum qui sanitatem aut præsentem tueri aut violatam restituere didicerit. Arcanis corporis disciplinæ legibus erudiri summum est medicinæ, sapientiæ culmen attigisse. Sapientiæ enim cum medicina, medicinæ cum sapientiâ mira societas: quid enim aliud est medicina quàm ex longis meditationibus, diuturnis noctisque studiis & laboribus, coacervata sapientiâ; ut quis ergo sapiat in rebus medicis primas rerum causas acri & intento animo intueatur oportet, & quæ sunt involuta & obscuritate naturæ latent contempletur. Plurimum opere & industriæ impendens ut veram & solidam rerum cognitionem attingat, hominem intus & in cute consideret, quanta sit in eo ex ætate, sexu, habitu, educatione, statu, exercitiis, solo, regione varietas.

## I I.

**A**RTEs quælibet non nisi ope quorundam instrumentorum exercentur. Hinc medicina non nisi pluribus adjuta præfidiis operatur; quamobrem multos habet ministros qui ab ejus pendent nutibus, qui vocati jussa statim exequantur. Chirurgia innumeris abundat instrumentis quibus indigemus. Omni genere quoque Pharmacia luxuriat instrumentorum quibus adornat quodque remedium; sed hæc communia, pervulgata medicinæ præfidia quibuscum multa non omnia consiciuntur! Philosophia mentis humanæ jubar non leve consert Medicis subsidium; vocum fere non intelligendarum tenebris olim sepulta fuit. Nunc pluribus experimentis stabilita maximum habuit incrementum: Gladio micante ignis partes mixtorum secantur; quæ sensus fugiebant fiunt manifestiora: quæ sit indoles succorum quibus alluuntur & aluntur nostra corpora quæ natura medicaminum declaratur. Hypotesis acidi & alcali plura Phenomena dilucidat. Hippocrates ab astrorum ortus & occasus attendebat ut prudentius exhiberet purgantia remedia & certè ab astronomiâ aliquid commodi percipi aliquando potest. Solertia, mentis in explicando quæ sunt obscura, sagacitas in distinguendo quæ sunt æquivoca, judicium in exponendo quæ sit sedes, quæ causa continens ægritudinis viros assert laboris fructus. Prudentia quæ scientia est de rebus eo loci præstandis, ut in omni vitâ, sic in medicina multum valet; quin & eloquentia non mediocriter prodest Medicis: hæc facit suaviora consilia medentium, dulci sermone asperitatem morborum & remediorum emendat. Quicumque hæc intra manus habet adjumenta velut cataphractus miles ad pugnam sic ad exercitium medicinæ paratus accedit. Nec aliud sibi deest nisi ut peregrinatione perficiatur.

## I I I.

**I**BIDEM loci vitam agere, labor ac dolor: animus varietate locorum oblectatur, diversorum hominum colloquio dutescit. Ut non omnis fert omnia tellus sic artes quævis non uno loco natæ. Ars medica longè diffusâ, sed variae variis in locis sunt curationis artes excogitatæ. Nonnullarum stirpium cognitione ac usu, tota medicina apud agrestes viros continetur; constat pluribus præceptis & experimentis apud doctos, ex quibus probè simul cohererentibus nomen artis refert; quapropter, nimis illam deprimunt qui tantum conjecturis innixam volunt. Jam inde antiquitus colli cæpit vix à Romanis tractata, plurimum à græcis exculpta; decursu temporum innumere sunt morborum

curationes inventæ: five quodd commodiora remedium genera fuerunt usurpata, five quodd sicut visa in cælis nova sydera, ita etiam novi morbi caput extulerint. Sic variolæ nec ab Hippocrate, nec à Galeno descriptæ, sic syphilis partibus nostris ignota, grassari cœpit in vulgus, indeque multa medicamenta vel eorundem variæ præparationes medicinam auxerunt. Interea mercurius & antimonium hoc ævo nostro fuerunt celeberrima. Peruviano cortici, Brasilienci radici magnus honos habitus. Felix ætas nostra tot ferè medicinæ videtur addidisse quot à pluribus accepisse. Hinc tanta laus Anatomicorum nostrorum à quibus tot partes in homine veteri recens detectæ sunt, sanguinisque circuitus, si non repertus certè multum illustratus; hunc enim Hippocrati notum fuisse, tanti viri scripta testantur multique post Hippocratem & ante Arvæum eandem sanguinis circuitus sententiam amplexi sunt; sed hujus doctrinæ si minus inventrix certè restauratrix & propugnatrix ætas nostra dici debet. Chimia paucorum hominum antè scientia, nunc plurimorum est atque inde quanta remedium suppellex. Quantumvis vero provida prædicetur natura, tamen non omne solum ferax optimorum remedium. Quin etiam si Plinio fides Patrii cibi præstantiores. Præstantiora medicamenta peregrina. Adeoque ex pluribus orbis partibus Medicus referre potest bona, gemmis & auro pluris æstimanda. Sed is perfectior Medicus evadet qui quantumque sanandi rationem exul patriæ medicatus fuerit, factò examine comperierit quâ viâ certius apud plerasque gentes deperdita sanitas recuperetur, quique usus fuerit variorum hominum in Medicina spectatissimorum consortio.

## I V.

**M**EDICUS cenferi non debet qui hominem nescit, hominem scire perfecte sine peregrinationis auxilio vix possumus: similis quidem ubique corporis humani structura, sed quàm dissimilis temperies, quàm dissimiles affectiones! Hinc qui plagas habitant orientales ut plurimum ignavi; qui verò septentrionales laborum patientissimi. Ni secedas à patria quid homo præstet homini quantum hic populus ab alio distet ægrè intelliges. Variæ morborum species sæviunt in genus humanum ab ære vario à variis cibis. Hinc Indis venerea lues, Italis melancholia, strumæ Hispanis, plica Polonis, scorbutus Danis, phtisis Anglis, Alpini Bronchocele quasi gentilitio jure propria. Ut gens quælibet singulares à natura dotes, sic morbos habet, variam quoque medendi methodum; quæ omnia latent eos qui semper in iisdem oppidulis latitant. Hic, si quis in morbum incidat, huic statim potus aquæ vitæ mixto pipere propinatur; hic catharticum remedium jamjam exhibetur. Hic per vomitum oggeritur; hic refrigerantibus; hic calefacientibus febres oppugnantur. Fluor alvi spes optimæ crisis apud aliquos audit, apud alios sudor, quod lymphæ degener ægritudinis cuiusque causa credatur. Frequens apud multos usus enematum apud Moscovitas nullus, apud Lusitanos venæ sectio ferè pro omni remedio est. Ab Italibus venæ secantur inferiores potius quàm superiores & id rarò. Ab Hispanis ex utroque simul brachio vel crure sanguis educitur ut æquilibrium sanguinæ molis servetur. Magna igitur populorum dissentio in medendi ratione, sed ad hanc opinionem discordiam rectè si attendatur non parva rebus medicis adferri lux potest, plurima inde deduci possunt documenta, quæ valde profint ad rectè medendum, sed hæc præstari facili non possunt ab eo qui semper in eodem oppidulo degit.

**N**ON eadem rerum facies apud quaslibet gentes, non idem rerum ordo, Stat nihilominus apud omnes imperii dignitas, inter cives tranquillitas; quid ni etiam pax humani corporis varia ratione firmetur, sanitas servetur aut restitatur. Sed quemadmodum in vitâ civili sapientiùs se gerunt qui multiplices urbes viderunt, varios hominum mores explorarunt: quid ni peritiores sint in medendo qui per multas & aliquatenus oppositas curationis artes probaverunt? Certè brevioribus pagi aut oppiduli coercita limitibus Medicorum industria; quid melius in praxi difficiliùs attingit: illorum aliqui sicut eandem eunt redeuntque viam, sic eodem ferè modo cunctis opitulantur ægrotantibus. Assiduus incola pagi vel oppiduli Medicus plebis favorem ambit sæpe numero; quod bonum ut adipiscatur consuetudini patriæ tritoque remediorum usui magis servit quàm enodationi veritatis. Amplioribus patent limitibus magnæ civitates ac præcipuè Parisiorum Lutetia quæ quasi totius orbis compendium, innumeros omnium penè nationum homines complectitur, & inquam non è Gallia modo, verùm etiam ex omnibus prope modum Europæ regionibus, admirabiles ac sæpe inauditi morbi vel curandi vel dijudicandi perferuntur. Hæc urbs populosa omnia ferè Medicis suppeditat peregrinationis commoda, ita ut is qui utitur sedulo, licet in eadem urbe deget peregrinantium tamen bonis frui quodammodo videatur. Medicina Philosophiæ soror hæc mox in hanc, mox in illam orbis partem ferri delectata est ut mundi totius ænigma si fieri posset aliquando solveret. Aliorum dicta, facta, consilia vel experimenta perpendere debemus, ut rebus omnibus æqua lance libratis, non serotina disputatione, sed maturo iudicio discussis, quid melius, quid æquius prudentissimè concludamus.

*Ergo peregrinatio utilis Medico,*

Proponebat Parisiis, LUDOVICUS PATHIOT, Tricassinus;  
Saluberrimæ Facultatis in Universitate Parisiensi Baccalaureus,  
A. R. S. H. 1743, à sextâ ad meridiem.